

# 400 calon PT3, SPM 2016 dirai

**BATU PAHAT** - Biro Pendidikan Parlimen Sri Gading meraikan 400 calon peperiksaan Sijil Pelajaran Malaysia (SPM) dan juga Penilaian Tahap Tiga (PT3) di bawah parlimen itu menerusi aktiviti motivasi serta program khas, sebagai usaha menyuntik semangat calon untuk bersaing mendapat keputusan cemerlang.

Ahli parlimennya, Datuk Ab Aziz Kaprawi berkata, aktiviti tahunan itu turut mendapat kerjasama Universiti Tun Hussein Onn Malaysia (UTHM), bertujuan memberi galakan serta sebagai pembakar semangat kepada calon terlibat.

Katanya, program kali ini diadakan dalam suasana kampus universiti agar calon merasai cara hidup serta keadaan sebenar di menara gading.

"Seperti biasa ia melibatkan calon

PT3 dan SPM dari Sekolah Menengah Agama (SMA) Parit Raja, Sekolah Menengah Kebangsaan (SMK) Tun Ismail, SMK Sri Gading, SMK Munshi Sulaiman, SMK Tun Aminah dan juga SMK Tunku Putra.

"Kita mahukan anak-anak ini tidak jemu belajar. Pendedahan ini membolehkan mereka tahu suasana di pengajian tinggi, seterusnya tanam semangat untuk melanjutkan pengajian mereka ke peringkat tertinggi.

"Kita berharap dengan adanya program ini, setiap calon dapat input terbaik seterusnya digunakan untuk keperluan mereka mendapatkan keputusan cemerlang nanti," katanya.

Beliau berkata demikian semasa Seminar Sokongan Moral Ibu Bapa Kepada Pelajar Calon Peperiksaan, Solat Hajat Serta Doa Kejayaan PT3

dan SPM Tahun 2016, di UTHM.

Sementara itu, Pengerusi Biro Kebajikan Umno Bahagian Sri Gading, Hamka Abu Dardak berkata, setiap tahun pihaknya tidak terlepas memberi sokongan kepada calon peperiksaan dan ibu bapa mereka.

Katanya, bagi ketiga-tiga peperiksaan besar iaitu Ujian Penilaian Sekolah Rendah (UPSR), PT3 dan SPM, pihaknya akan melakukan program seperti ini dan kemuncaknya ialah solat hajat serta doa kejayaan.

"Begitu juga setelah calon dapat keputusan, kita akan raikan mereka terutamanya yang cemerlang. Ia sebagai memberi sokongan dan dorongan. Tradisi ini juga penghargaan kepada calon dan ibu bapa yang berada di dalam kawasan Sri Gading, atas kerjasama selama ini," katanya.



Ab Aziz bersama pelajar dan juga calon PT3 serta SPM yang akan menduduki peperiksaan tahun ini.